

L'èvevaïdige di poûessèyê.

Le p'tét loup Rauraque é bîn crâchu. Mon Dûe qu' les afaints aint poéyu djôtaie d'aivô lu. E ritait aiprés les étchènes de bôs qu'èls yi tchaimpînt pe è les raippoétchait. E rôlait âtoué des dgens d' lai tribu. Mains tiaind qu'è feûnait des loups qu' péssînt, le voili qu' lainçait è fond d' train vés yôs. E r'veniait aidé vés nôs dgens en aittiraient les poiraintes bêtes d'aivô lu, che bîn qu' d'âtres loups feunent bîn soîe aïprevéjies. D'aivô l'temps, ces loups dev'niaïnent des sâvaïdges tchîns pe des tchîns.

Lai tcheusse se f'sait bîn pus soîe d'aivô les tchîns. Les tcheussous n' sôlînt p' è porcheûdre les yievres, les cies, les poûessèyês, les échpèces de sâvaïdges motons è tchievres. Meinme les oués, qu'êrouéy'nès poi lai porcheûte des tchîns, poéyînt être tçhvès soîe poi les hannes. Mains les sâvaïdges bêtes se f'sînt raîes alentoué. Les tcheussous daivînt cheûdre les tchîns, rôlaie aidé pus laivi. L' tchéf d' lai rotte qu' sôlait âchi d' s' aidé daivoi dépiaicie, s' musait en tot çoli .

In djoué, è d'maindé en ses hannes d' bairraie ïn prou grôs ençhôs d'aivô des pâjainnes roétches â béche, pe d'entéchie des trontchats è des grantes entrecroûejies braintches poi d'tchus. An n'poéyait entraie dains l'çhôs qu' poi ïn étrèt seintie bîn coitchie drie d'lai r'venûe. Pe, an aïpregné és tchîns qu'an condûjait bîn laivi, è aidé r'v'ni vés l'entrée di çhôs. El en é fayu di temps po yôs aïppâre, en yôs tchaimpînt des moéchés d' bôs d'vinte en vinte mètres, è r'trovaie le t'ch'mîn que r'veniait aidé en lai meinme piaice, po les drassie po ci traivaiye.

Dains l'ençhôs, drie lai r'venûe, an creûyont ïn fond è grôs p'tchus, ènne échpèce de traïppe qu'an r'tieuvont d'braintches, d'mousse è pe d'feuyes. C' feut mâlaîjje, tot r'tchoéyait aidé dains le p'tchus, mains è foûeche de rêcmencie, an y airrivont. Poquoi qu'le tchéf f'sait è faire tot çoli? E bîn, di temps qu'è tcheussait, èl aivait vu qu'ènne rotte de poûessèyês r'veniait s'vent â meinme yûe, dains ïn bôs de tchènes po bâchaie lai tiere pe bâfraie les yainds. E saivait qu'ses dgens étînt latchous de tchie d'poûessèyês. Mains lu, è n'saivait p' poquoi, èl ainmait chutôt voûere vétchie ces coéraïdgeouses bêtes. Tiaind qu'èl était tot p'tét, èl aivait ôyi lai raiconte di pus véye d'lai rotte : l'hichtoire d'lai p'tête Djeânne d'aivô son p'tét loup aivait péssè les siecles! C' qu'aivait fait ç'te baich'natte, aïprevéjje des sâvaïdges bêtes, an l'daivait poéyait r'faire. Dâli, dâs grant èl aivait bèyie l' oûedre que niun n'aïgrotteuche les bêtes di bôs des tchènes... !

El était r'veni bîn s'vent tot d'pai lu, voûere ç'te rotte de poûessèyês po lai meu coégnâtre, po saivoi ses aivéjainces. L' derie còp qu'èl était v'ni, èl aivait comptè quatre varrêts, quatre f'mèlles d'aivô tchètchène ché obîn sèpt mairtçhaissîns.

Dains lai neût d'lai neûve yune, è raissembyé ses tcheussous po raïpp'laie en tchètçhun ç' qu'è daivait faire. Es païtchainnent tus d'aivô tos les tchîns vés l'bôs des poûessèyês en f'saint ïn grant détoué po se n' pe trovaie d'lai sen qu' çhoûeçhait l'oûere. C'était è po prés è dieche yûes d' l'entrée d' l'ençhôs. Tchètçe moïnnou de tchîn l' daivait faire è s'caïje. Yote coulainnée ençaçhait mitnaint tote lai haidje de poûessèyês. E n'y aivait ran qu' d'ènne sen qu'an aivait léchie ènne péssèe sains vadgeous. C'était poi ci p'tchus qu' ès daivînt faire è péssaie les sâvaïdges poûes po les dyidaie encheûte vés l'ençhôs. Dâs drie les boûetchêts ès poéyînt voûere mitnaint les bêtes qu' n'aivînt ran senti, qu' bâchînt lai tiere d'aivô yôs moères po trovaie des yainds, pe des raiceïnes. Les mairtçhaissîns djûînt c'ment des p'téts fôs d'vaint d'engoulaie tot ç' qu'ès trovînt qu' dépéssait d' lai tiere. Les tchîns s'aïcreupéchainnent poi tiere, èls étînt bogrement bîn drassies. E n'y en aivait piepe yun qu' djaïppait.

E s'était péssè quasi ènne heure, l' soraye se y'vait è poinne è rais d' lai côte d'en faïce, tiaind qu'yun des varrêts feûné ïn tchîn qu' s'était aïprethie d'ïn pô trop prés. C'ment ïn éyuje, l'

varrêt tchaidgé en breûyaint. Le tchîn s'laincé chus lu en djaïppaint bîn foûe, aimeûtaint d'âtres tchîns qu' s' lainçainnent chus l' poûessèyê. Lai yutte feut coétche mains terribye. Qu'în tchîn feuche biassie, d'âtres r'pregnînt sai piaice en r'trovaint yos aivéjes de loups. Moûeju chus tot l'coûe, tirâyie dains totes les sens, écatch'lè, pichaint l'saing, l' varrêt n'en poéyé pus. D'în côp, è tchoéyé moûe. Les âtres sâvaïdges poûes laincînt è drète, è gâtche, les mairtçhaissîns écouvînt l'bôs c'ment d' grantes quouës drie yôs méres en gronç'naint. Les tchîns djaïppînt. Encoéraïdgies poi les ailouxèes des hannes, ès vadgînt lai fôl' haidge, prij'niere â moitan d' l'échpèce de çaçhe qu'pregnait totes souêchetes d'aillures en s' dépiaïçaint.

El é bîn fayu quatre houres d'vaint d'airrivaie vés l'ençhôs. Lai paitchie n'était p' encoé diaingnie. E n'fayait p' pèssaie d'côte d' l'étrèt allou qu'moinnait vés l'entrée d' l'ençhôs. E n'y é ran qu'enne sâvaïdge trûe qu' s'ât poéyu sâvaie d'aivô quéques p'téts mairtçhaissîns, è câse d'enne grôsse roitche qu'les tchîns n'aivînt p' poéyu brâtaie prou tôt. Ch'vôs aivîns vu c'ment qu'ès s'étînt tçhissie!

Les tchîns euvrainnent le çaçhe d'vaint l'ridé de r'venûe. E n'é p' fayu brâment d' temps en ène sâvaïdge trûe po compâre qu'èlle s'poéyait sâvaie drie les bouêchetès. Elle s'y enf'lé en dieulaint, cheûyèe poi tote lai haidge. Dains îñ grôs traiyîn, tote lai rotte se tchaimpé dains le p'tchus, dains lai traïppe. Les poûessèyês étînt d' dues bêtes. Ran qu' quéqu'yuns s'étînt îñ pô émeutlès en tchoéyaint l'yun chus l'âtre, mains èls étînt tus bîn vétçhaints. L'entrée di çhôs feut bîntôt bouêchetie, di temps qu' quéques hannes allînt r'tçheri les réctes di poûre moûe poûessèyê qu'an n' aivait p' poéyu raimoinnaie. E n'yi d'moérait pus qu'è aittendre, qu' les sâvaïdges pôues, bîn neurris poi yôs maîtres, s' moïneuchînt pyain pe se f'seuchînt en yote neûve vie d'aïpprevéjies bêtes.

Dains lai vâprèe, les dgens s'raïssebyiaïnnent âtoé d' l'ençhôs. Les poûessèyês aivînt dj' creûyie dains lai tiere d'aivô yôs moéres, pe poéyînt dj' souêtchi d'lai traïppe. Les afaints graïpoinnînt ch'lai bairre. Es sor'yînt en raivoétaint les mairtçhaissîns djûere ensoinne en s'ritaint aïprés, en s'moûedjéyaint, en s'rôlaint en valmont l'yun chus l'âtre. Qu'èls étînt bés d'aivô yôs djânes réyures ch'le coûe. Des côps, an poéyait âchi voûere, â traïvie des braïntches, les véyes poûessèyês d'aivô yôs grantes biaïntches défeïnses â bout di moére. Es n'venyînt p' tot prés d' lai bairre, mains d'moérînt coïtchies â meu drie les aïbres.

L'soi, âtoué di fûe, tiaïnd qu'an eut bîn maïndgie di poûessèyê qu'était moûe di temps de ç'te souêtche tcheusse, l' tchéf ècmencé sai raïconte en évairaint: « C'te neût d'lai neûve yune, tiaïnd... ».

J-M. Moine